

1 NWER NYI POL NYONO TV ANEB ERO BA LI GO KORINT

¹ Me Pol wo, ji koro Esowo, á yehk-m no re me n jol ntiingetib no Kraist Jisos, awahr a mmonannee Sostenes,

² e kp'nyono nwer nyia tv aneb Esowo ba li go Korint, bao ba Kraist Jisos ma ru ntim ebo, fere yehke bo re bo jol ebo ebo ka Esowo, budu ane bao ba kp'kake ero edi ajehng ajehng go mbing nyi Ntul a Jisos Kraist ji li ntul abo, a ntul ewahre fvfo.

³ Nong, Esowo Nso ejahre, a Ntul a Jisos Kraist ka-n nnoobo, a elkoono.

Elfuulu ni Kraist kpo fuulu

⁴ N kpo kak Esowo saam ngare anyehng anyehng tib wahn, tib go nnoobo nyi Esowo ma-n ka, eji á ka-r Kraist Jisos.

⁵ Tib eji á li ajehng a Jisos, owo wahnge m ma fang go alum abungu kpee, a elkahne anehng anehng.

⁶ Alum nya Kraist nya wob-n go egahne atahng ebgbal, fere tahne.

⁷ Ano wo wahnge nnoobo anyehng anyehng nyi Esowo ka-r no kil-n ebkpe rin, ana á kp'siki re bo lennge Ntul a Jisos Kraist ka-n.*

⁸ Á bahk-n kuuru tete rehng go es'kohro efung, eji á l'li eno go efung bio bi Ntul a Jisos Kraist.†

* 1:7 1:7 Tait 2:13 † 1:8 1:8 Fil 1:6

⁹ Tibre Esowo kpi ekakesehk, ye ji yehk-n no re wahn ba jol ajehng a Mmon ewe Jisos Kraist Ntul ewahre.‡

Elyabe ni aneb ero yabe no

¹⁰ N kp-n rehke abonanee go mbing nyi Ntul a Jisos Kraist re wahn ane kpee jo bung, bum nnyo amehng, ny'yabe anyehng anyehng k'kpe jol go egahne ellong. Sahb jolen jol ajehng go eltim anehng, a ntir anyehng.§

¹¹ Tibre, abonanee, ane ba li etahk Kloe ma-m tong re, wahng kp'taange atemtem.

¹² Ellum ni n kp'bungu a, n kp'bungu bade ane bandiki ba kpo bung re, bo li ka Pol, bandiki re, bo li ka Apollos, bandiki re, bo li ka Pita, bako re, bo li ka Kraist.

¹³ Anv, Kraist ebyab, jol ag'gabe ag'gaba? Pol wo bo kum-e go ekros ka-na? Anv, wahn bele ewohngalahb go mbing nyi Pola?

¹⁴ Me n kak Esowo saam, eji n ki wohngo nne awohng awohng ewahne alahb, sehngem Krispus,* a Gayus,† bo ba n wohngo bo alahb.

¹⁵ Nnene limm, no bahke ma bung re á bele ewohngalahb go egama mbing.

¹⁶ Oo, n t'tob wohngo Stefanas alahb fvfo, a aneb etahk ebe. N nehme kpe buumu, joare n kp'kpe wohngo nne nondiki alahb budu.

¹⁷ Tibre Kraist me tumem re me m ba wohngo ane alahb. Á tum-m re me n song tiingi nnoobo etib. Limm re me m bung ana nne no kpo mal

‡ 1:9 1:9 2 Tes 3:3 § 1:10 1:10 Fil 2:2 * 1:14 1:14 Elt 18:8

† 1:14 1:14 Rom 16:23

alum abungu go elkahne ni ane, tib eji nsahm nyi elkv ni Kraist kpo no go ekros l'k'gbod.‡

Kraist wo li nsahm, a elkahne ni Esowo

¹⁸ Alum nyao nya li bade ekros ji Kraist kpoo no, li agboolo nsol go ejang ane bao ba kp'tane.§ Go egahre ejang, wahr jia ji kp'bele eltahre, alum nyao li nsahm nyi Esowo.

¹⁹ Tibre bo nyono go nwer Esowo re, “Esowo bungu re,

M bahke ranngel elkahne ni akahnkahn ane, fere yehke ntir nyio nyi aneb ngbere, ro go.”

²⁰ Anv, kehm jolo renan bade akahnkahn ane bao, a aneb ngbere fvfo? Kehm jolo renan bada nne no kpo ware go nnyo go njini nyia? Esowo ebrod elkahne ni njini nyia bum ana egboolo ejum.

²¹ Tibre Esowo go ege elkahne wo, á kpane ane re bo ki-e kahn go bo elkahne. Kpo kor Esowo re á tahre ane ba l'taame tv etib bi e kpo tiingi, bi kpo jol ane bako ana egboolo ejum.*

²² Jus kpo seb re bo nyehn akpokosi.† Grik kpo seb elkahne.

²³ Ana wahr, wahr kpo tiingi etib bi Kraist ji bo kum-e go ekros. Go ejang bi Jus, etib bia li ana esiti mbang. Go ejang bi ane ba ki li Jus, li egboolo ejum.

²⁴ Go ejang ane bao ba Esowo ma yehke bo, bo li ma jol Jus, bo li ma jol ane baka baka, etib bia ana, Kraist wo, ji li nsahm nyi Esowo, a elkahne.

²⁵ Etib bio bi Esowo, bi kpo jol egboolo ejum go esamahr ane, nobo sehngel elkahne ni ane.

‡ **1:17 1:17** 1 Kor 2:4 § **1:18 1:18** 2 Kor 4:3 * **1:21 1:21** Mat 11:25 † **1:22 1:22** Mat 12:38

Nsol nyio nyi Esowo nyi kpo jol aleenge nsol go esamahr ane, tahne sehng eko ji ane.

²⁶ Abonanee, buumen ana n jolo no, eji Esowo lung-n no. Egom ejahne ntiil ji jolo akahnkahn ane. Egom ejahne ntiil ji jolo aj'jok ane, fere jol agburu ane ba bele ellub go njini nyia.

²⁷ Esowo ebyehke nsol nyi li agboolo nsol go esamahr njini nyia ko, riki akahnkahn ane ndon, fere yehke nsol nyi kil tahne go esamahr njini nyia, ko, riki aj'jok ane ndon.

²⁸ Esowo ebyehke nsol nyi li rede rede, nyi kil jo lub ane ba li go njini nyia, nyi bo kpo fere bung re, "Ejumjum o lohngem!" Eji á l'rede nsol nyi njini kpo tir re li atahntahn nsol, eji l'k'kpe jol ejumjum.

²⁹ Jia lohngo re, nnene limm, no bahke ma wor nnyo go esamahr bi Esowo.

³⁰ Ye wo ka-n Jisos Kraist, eji n l'jol go elkpin n'ne. Kraist wo, Esowo m-e ko, lim-r e ma jol akahnkahn, fere li eno go ege esamahr, fere jol ejahre ejahre. Ye wo ma-r fak yake.

³¹ Ano wo fvfo bo nyono go nwer Esowo re, "Nne no l'kehme nnyo wor, á wor nnyo tib go nsol nyi Jehova ma lim."

2

Etib bi li bade Kraist ji bo kum-e go ekros

¹ Abonanee, eji m ba go egahne ba yiimi ntianse ka Esowo, n joom bung ayebebebe alum, fere jo bung go elkahne nehka nehka.

² N tiri go egame eltim re, n nehm kpe bung ejum ajehng ajehng jehka jehka tong-n, m bahke

jo bung bade Kraist wo wo, asehnge sehng e elkv ene ni m bahke jo ga bung.

³ Eji n jolo a nahne, n leenge sehng, jo fahl, fere jo k'kahn.*

⁴ Etib bi n tiingi no, a alum nya m bungu no, m bungem ana nne no kpo sahb m'mal elbunu go elkahne ni nne. N fere jo tib nsahm nyio nyi etohko ji Esowo,†

⁵ goji eltaame enahne l'k'kuumu go elkahne ni nne, eji l'kuumu go nsahm nyi Esowo.

Elkahne ni Esowo

⁶ Tibre alum nya n kpo bung kpi elkahne ka ane ba ma gbal go ejang bi Esowo. Elkahne nia lohngem go njini nyia. Elkahne nia limm elkahne ni ane ba kpi njini nyia fili, bo jio ji bahke tane.

⁷ Elkahne ni n kp'bungu a, elkahne ni Esowo ni, ni ki li gbuul, ni Esowo behre no. Bomo go mbomannahb, njini kehm jolo, Esowo yehke elkahne nio re jol ellub n'nahre.

⁸ Ntul awohng awohng limm go njini nyia, no kahne elkahne nia. Li re bo k'kahn, kehn bo jolem kumu Ntul no kpi ellub go ekros.

⁹ Nwer Esowo bungu re,
<<Nsol nyi nne kala ny'nyehn, fere w'wuk,
nyi nne kala t'tir go ege eltim re bahke jolo,
nyi nyi Esowo ma toobo bum ane bao ba ye kpi
bo kor,>>

¹⁰ ny'nehm nyi Esowo ma lennge ka-r go ege etohko.‡ Tibre etohko ji Esowo ji kpo rab ejum

* 2:3 2:3 Gal 4:14 † 2:4 2:4 1 Tes 1:5 ‡ 2:10 2:10 Mat 13:11

ajehng ajehng, fere jo rab nsol Esowo nyi li go mbiiri.

¹¹ Nne, etohko eje ji ji kp'kahne kpee bade ana á li no. Ano wo fvfo, etohko ji Esowo kp'tob kahn kpee bade Esowo. Nnene limm, no kp'kahne.

¹² Wahr belem etohko ji njini nyia ana, e bele etohko ji Esowo tumu no tv, eji e l'kahn ayare nya Esowo ma-r ka.

¹³ E kpehme bung alum nya nne tib-r no go ege elkahne. E kpo bung alum nya Etingi Etahko tib-r no, eji e kp'tooro nsol nyi etohko, tong ane bao ba kpi etohko ji Esowo.

¹⁴ Nne noka noka no ki kpi etohko ji Esowo, á nehm ma bel nsol nyi etohko. § Tibre á nehm tiki kahn, eji li agboolo nsol go ege esamahr. Tibre elkahne nio ni nne bahke kahne nsol nyio, elkahne ni etohko ni.

¹⁵ Nne no kpi etohko jio ona ji Esowo, á bahke ma lam elam ajehng ajehng. Yefono antahng, nnene limm, no bahk-e ma lam.

¹⁶ Nwer Esowo bungu re,
 “Nne awo li nne no kp'kahne ntir nyi Jehova,
 nyi á bahk-e tubu elle?”*
 Wahr ba kpi ntir nyi Kraist.

3

Alokeltum Esowo

¹ Abonanee, etingitingi, m maam bung a nahne ana n jol bungu a ane ba kpi etohko ji Esowo. M bungu a nahne ana n jol bungu a ane ba njini nyia, a abonbili ba li go ejang bi Kraist.*

§ 2:14 2:14 Jon 8:47 * 2:16 2:16 Rom 11:34 * 3:1 3:1 Jon 16:12

² N jo le-n go alahbbel, wahn n joom le go nsol alehke nyehka ga nyi kp'tahne. Tibre n jang ma li. Jol tete sik anv, n nehme ma li.[†]

³ Tibre n kpeke li na li jang jang ana ane baka baka. N l'fere bel eteelala atemtem, fere jo taange, jia nehme tib re n kp'limi eljini ni ane baka baka ba li njini nyiaa?

⁴ Nne noka l'tong re, ye li ka Pol, noko re, ye li ka Apollos, lohngem re n kp'limi eljini ni ane baka bakaa?

⁵ Nne awo li li Apollos? Nne awo li li Pol? Bo alokeltum Esowo ba, bo ba wahng n taame tv Esowo. Bo, nne awohng awohng kp'limi eltum ni Ntul ka-e re á lim.

⁶ Me wo jo bahm, Apollos jo toomo alahb,[‡] Esowo bi kpo ka nlak.

⁷ Nne no kpo bahm nsol, a nne no kpo toomo alahb, ejumjum goji bo limm. Esowo ntahng-tahng bi li elahmlahm ejum, tibre ye wo kpo ka nlak.

⁸ Nne no kpo bahm, a nne no kpo toomo alahb, bo li jang jang. Nne awohng awohng bahke bele eltuuru ene, ana á limi eltum.

⁹ Wahr ebkod abo, lim eltum ka Esowo. Wahn ba li edi egbe ji Esowo. Wahn tob li etahk ji Esowo.

¹⁰ Nnoobo nyi Esowo ma-m ka, nyi nyi m ma ko bum nnahb ekahme nyia, ana etingitingi nsehketahk no nno a nno. Nne noko kp'lange ero. Nong, nne awohng awohng jo kunu ekpu ana á kp'lange.

[†] 3:2 3:2 Hib 5:12-13 [‡] 3:6 3:6 Elt 18:24-27

¹¹ Nnahb ekahme anyehng anyehng limm, nyi bo bahke kpe bum, sehngem nyi bo ma si b'bum, nyi li Jisos Kraist.

¹² Egom jindiki bahke koko agul, fundiki asilva, fundiki atal nya nno a nno, lang kunu go nnahb ekahme nyio. Egom jindiki bahke koko ajang nti, fundiki amang, fundiki akomo si.

¹³ Eltum nne awohng awohng, bo bahke nyehne. Efung bio bi Kraist, agun nya bahke tibi ana eltum ni nne awohng awohng jolo no. Agun nyao bahke wuungu eltum anehng anehng, joare n'nob, afi nobem.

¹⁴ Ejum ajehng ajehng ji nne l'si, kunu go nnahb ekahme nyio, l'sahb agun, nne noo wo bahke bele eltuuru.

¹⁵ Nne awohng awohng no eltum ene l'fi, yeblim eltum mbol mbol. Yefono antahng bahke bele eltahre ana nne no ma bohngo lohng go agun.

¹⁶ Anv, á nehme kahn re, wahn ba li etahk ji Esowo, ji Etingi Etohko ma ba lene tob-na?§

¹⁷ Nne awohng awohng no l'rannge etahk ji Esowo, Esowo bahk-e tob rannge. Tibre etahk ji Esowo li mbarebare ejum ji li saang. Etahk jio, wahn ba.

¹⁸ Nong, nne awohng awohng k'nehm elne. Nne awohng awohng go egahne ellong no l'tong re, ye li ekahnkahn nne go njini nyia, nong, á fere jol egboolo nne, eji á l'fere jol ekahnkahn nne ji nno a nno.

§ 3:16 3:16 2 Kor 6:16

¹⁹ Tibre elkahne ni njini nyia, go ejang bi Esowo li egboolo ejum. Ana nwer Esowo bungu re, “Á kpo bob akahnkahn ane go bo elkahne.”

²⁰ Edi nwer Esowo jehko kpe bung re, “Jehova kp'kahne re, ntir nyio nyi akahnkahn ane lohngem ejumjum.”

²¹ Nong, nne awohng awohng k'geere kak ejum ajehng ajehng ji nne. Ejum ajehng ajehng jia ana, j'jahne ji.

²² Pol, a Apollos, go Pita, njini nyia, elkpín, elkv, eying jia ji anv, a eying ji es'song, kpee nsol nyia, ny'nyahne nyi.*

²³ Wahn, Kraist wo kpi-n. Kraist, Esowo bi kpi-e.

4

Abatiingetib Kraist

¹ Nobo re nne ko-r ana alokeltum Kraist, ba Esowo ma kak bo nsol enye go ebo, nyi á behre no.

² Ejum ajehng ji li ka nlokeltum li re, á jo lim ji nde tong-e no.*

³ Egame, m-e nehme lub, jol afi m' bungu renan bada name, afi njini nyia fvfo bungu renan bada name. Jol me n kpehme lam elname.

⁴ Jol n nehme kahn ebi ejum ji m ma l'lim. Jia lohngem re, me n li eno. Tibre Jehova ntahngtahng wo bahk-m lame.

⁵ Owo wahng ka nobo re wahn k'jo lam nne awohng awohng, ngare nyio kehm rehng, nyi Ntul ewahre bahke bake. Nsol nyi li mbehr

* **3:22 3:22** 1 Kor 10:23 * **4:2 4:2** Luk 12:42

mbehr go ejannge, á bahke lohngo a nyi go edi ji li gbuul. Nsol nyi wob go ntim ane, á bahke lennge, nne awohng awohng nyehn. Owo Esowo bahke kehm tehke nne awohng awohng ana fuumu re á tehk-e.

⁶ Abonanee, esi ejahne ji wahnge n limi ntugare nyia bade Apollos a me, eji n l'kpili ejum go egahre, ji li re, wahn kahn ana m bahke jo jen, jang jang ana nwer Esowo bungu no. Nong, nne awohng awohng ewahne k'jo geere kak nne noko, fere jo daange nne noko.

⁷ Nne awo tong-a tong re wobnob sehng ate eba? Ejum aji a kpi no, ji ki li Esowo ka-a no? Anv, jen ji wahnge a kp'woro nnyo kunu ejum ji a kpi no? Esowo sang ka-aa?[†]

⁸ Anv, wahn ebbel ejum ajehng ajehng ji n kp'sebe. Wahn ebfang, wahn ebfere jol atul.[‡] Wahr ka jol.

Kp-m koro re, wahn lohko jol atul, goji wahr l'tob jol atul a nahne a nahne.

⁹ Li re Esowo ma-r lim re, wahr jol akahlenjahm ane, wahr ji li abatiingetib ebe, ana ane ba bo kp'gohro lam es'kohro elam ji bo bahke wulu bo. Tibre bo kp-r sono go elkab ane, fere son-r go esamahr bi babenjel, a esamahr ane kpee.[§]

¹⁰ Wahr agboolo ane ba tib go esi ji Kraist. Wahn akahnkahn ane ba go ejang bi Kraist. Wahr li lenge lenge, wahn kp'tahne. Wahr, bo kpo daang-r daange, wahn, bo jo kak-n.

[†] 4:7 4:7 Rom 12:6 [‡] 4:8 4:8 Ell 3:17 [§] 4:9 4:9 Rom 8:36; Hib 10:33

¹¹ Tete sik anv, e kpo jen njal njal, alahb fere jo kor-r. E kpo kak ajakensol go ngubjing. Bo kpo dv-r. Ekehng ajehng ajehng e kpimm.*

¹² E kpo sahb l'lim eltum abo gbalee, jo le elnahre.† Bo l'su-r, e kpo biri nnoobo tv bo. Bo l'nohk-r, afi bo lim-r ejum ajehng ajehng, e kpo kp'kpuumu.

¹³ Bo l'kiimi afahng lak-r, e faange bo go mbang nyi e bahke koono. Wahr ebjol ana nkahr nyi njini nyia, fere jol ana akpake mbang tete rehng anv.

¹⁴ Eji n kp'nyono ana tv-n, lohngem re n kp'sebe re me n rik-n ndon. N kp-n kake na erehke ana abon ebame antahng antahng.

¹⁵ Afi rn bele at'tibi gbalee ba ki li go nfange, n kpi nde awohng. Me n jol nso ejahne tib go alum nya Kraist Jisos nya m bungu no tong-n.‡

¹⁶ N kp-n gboongo re, wahn toono eljini ename.

¹⁷ Owo wahng m ma tum Timoti tv-n, ye ji kpi ekakesehk. Ye wo li ekorokoro mmon ewame go ejang bi Ntul a Jisos. Ye wo bahk-n buumu ana eljini ename li no go ejang bi Kraist. Nsol nyi o, nyi n kpo tib go ero abehng abehng bi li edi ajehng ajehng.

¹⁸ Egom ejahne jindiki ebkehme elgeere. Bo kp'tiri re, me n nehme kpe ba go egahne.

¹⁹ M bahke gulu elbake go egahne, Jehova l'taame. Owo m bahke ba seb antahng kahn elkohn nsahm ana nyi aneb elgeere bao kpi no, jol alum nnyo ebo sang.

* **4:11 4:11** 2 Kor 11:23-27 † **4:12 4:12** Elt 20:33-34 ‡ **4:15 4:15**
Gal 4:19

²⁰ Etul bi Esowo limm ejum ji nne bahke bungu go nnyo a nnyo, li na ejum ji nne bahke tibi nsahm.

²¹ Anv, jen ji n kp'sebe? Me m ba go egahne ehti go eboa, afi me m ba go elgoro ana nnaanga nne?

5

Erehbe bi nne ero limi no

¹ Nne awohng awohng ebwuk re, nne noa, wob go egahne ellong, no ma lim erehbe ana bio bi jol ane ba ki nyi Esowo kala l'lim. Tibre bo tong-m re, nne awohng go egahne ellong kpo noongo a nkal a nde.

² Bahke limi renan, n kehm g'geere? Ji ga nob li re, wahn jo guunu. Yehken ye jio ji ma lim elkohn ejum ana jio go egahne ellong!

³ Jol afi go ngubjing n li fee, etohko ejame li a nahne o.* Me n lam nne noo no limi elkohn ejum ana jio go mbing nyi Ntul a Jisos, ana n jolo na o a nahne.

⁴ Ana n kpo kono asi edi ajehng, n kpo tob ba jol a nahne o go egame etohko. Nsahm nyi Ntul a Jisos nyia, a nahre.†

⁵ Owo nobo re, wahn yake nne noo, kak nnehm go ebo, goji ngubjing enye l'ranng, etohko eje l'fere bel eltahre efung bio bi Ntul a Jisos.‡

⁶ Elgeere enahne ni n kp'geere nobem. N ka wuk a wuk elgan ni bungu re, "Abons'sohko amohk ayist kpo lim ebred kohro kohro tunga?"§

* 5:3 5:3 Kol 2:5 † 5:4 5:4 2 Kor 13:10 ‡ 5:5 5:5 1 Tim 1:20

§ 5:6 5:6 Gal 5:9

⁷ Nobo re wahn yehke nk'kulu eyist nyio nyi abiafem, eji n l'jol ebred ji nfenfe, ji ki kpi etoongo eyist ajehng ajehng. N kp'kahne re, n lohko li go etingitingi. Tibre Kraist ji li mmon a njoro no Pasova ejahre, ye wo, bo m-e rod lim njom.

⁸ Nong, wahr k'ko ebred jio ji kpi nk'kulu eyist nyio nyi eblum alimi, a ab'bi, li elkak nio. Nong, wahr ko ebred ji ki kpi eyist, li elkak nio. Ebred jio ji li saang, ji li etingitingi.

⁹ Go egame nwer nyi n nyono tv-n, n nyono re, wahn k'jo kod abo, lim ejum ajehng ajehng a ane ba kpo noongo a ane.

¹⁰ N nehme bung bade ane baka baka, ba kpo noongo a ane, ba li go njini nyia, ane ba kpo baare amahr go nsol ane, a awajv, go abajomeblom. Re wahn kehm lohngo go ellong ane bao, kehn m bahke lohngo go njini nyia abo akpade akpade, tahm edi jimongo.*

¹¹ Nwer nyi n nyono tv-n, n nyono re, wahn k'jo kod abo, lim ejum ajehng ajehng a nne no kpo tong re, ye mmonanne ejahne wo, fere jo noongo a ane, jo baare amahr go nsol ane, jo jom eblom, fere jo kiimi afahnge lake ane, jo wo amahm, jo v ejv. Kana jo li nsol alehke a elkohn nne noo!†

¹² Tibre limm ka-m re, me n jo lam ane baka baka. Aneb ero ba, nobo re wahn jo lam bo.

¹³ Esowo bi kpo lam ane baka baka. Tibre nwer Esowo bungu re, "Kamen ebi nne yehke go egahne ellong!"

* **5:10 5:10** Jon 17:15 † **5:11 5:11** 2 Tes 3:6; Tait 3:10; 2 Jon 10

6

Alam nya aneb Esowo kpo kak aneb Esowo bako

¹ Nne awohng awohng no nfem l'gbo bo a mmonannyehn, á bahke sahbe song kak-e elam goji ane baka baka ba ki li aneb Esowoa? Nong, aneb Esowo toobo nfem nyio o.

² Ní nehme kahn re, aneb Esowo ba bahke lame njini nyia aa? L'fere jol re wahn ba bahke lame njini nyia,* jen ji wahnge n l'k'ma toobo abon afem ana bao?

³ N nehme kahn re wahr ba bahke lame baben-jela? Jia bahke jolo renan, eji n kil ma toobo abon nsol ba njini nyia a?

⁴ Anv, nfem ana nyio l'gbo, jen ji wahnge n bahke yake ka ane bao ba ki wob ero, ba kil jo lub aneb ero?

⁵ Ndon a nahne! Anv, lohko li re, nnene limm go egahne ellong no kp'kahne ana á bahke ma toobo nfem nyi ma gbo go ellong aneb Esowoa?

⁶ Anv, n'nob re mmon Esowo noko kak mmon Esowo noko go esuba, eji ane baka baka l'lam-ea?

⁷ Jol nobem na re wahn kak atemtem go elam. Ga nob re wahn taame go ebi ji bo ka-n mbol mbol, nyehn erem, fere taame re bo taare nsol enyahne ko.†

⁸ Wahnfono antahng kpo soodo ane, fere taare bo nsol go eko, jol abonane ebahne n kpo lim bo ano.

⁹ N nehme kahn re, abi ane nehm yel ejahbetul Esowoa? Kana jo nehm elnahne! Ana ane bao ba

* 6:2 6:2 Ell 3:21 † 6:7 6:7 Mat 5:39

kpo noongo a ane, abajomeblom, abalimerehbe, ane ba kpo lim ab'bi nyao nya bo kpo noongo atemtem, nya aneblum kpo noongo atemtem, anebkal noongo atemtem,

¹⁰ awajv, ane ba kpo baare amahr go nsol ane, anebe nw'woko, ane ba kpo kiimi afahnge lake ane, a ane ba kpo taare ane nsol go eko, bo nehm tiki yel go ejahbetul Esowo.

¹¹ Egom ejahne jindiki jolo elkohn ane bao. Anv, Esowo ebru ntim enyahne, wahn ebjol ejahne ejahne ka Esowo, wahn ebli eno go esamahr Esowo tib go mbing nyi Jisos Kraist ntul ewahre, a etohko ji Esowo.

Agubjing enyahne li ka Esowo

¹² Nne nondiki li ma tong re, “N li ma lim ejum ajehng ajehng, nsahde limm.” Nsol kpee sang kpo kak nne ebo. Etingitingi, n li ma lim ejum ajehng ajehng, sehngem re, n nehme seb re, me n jol nju go eyaame ajehng ajehng.‡

¹³ Nne nondiki li ma bung re, “Nsol alehke li ka ala, ala li ka nsol alehke.” Esowo bahke limi nsol ebal ebal nyio tan. Ngubjing limm ka ab'bi, li ka Jehova. Jehova tob li ka ngubjing.§

¹⁴ Esowo bi nyahme Ntul a Jisos go elkv, á bahke tob nyahm-r go ege a nsahm.

¹⁵ N nehme kahn re, ngubjing enyahne li ejum ngubjing nyi Kraista?* Anv, n'nob re me n ko ejum ngubjing nyi Kraist, kono edi ajehng a ngubjing nyi nne as'saa? Nobem ano!

‡ 6:12 6:12 1 Kor 10:23

§ 6:13 6:13 1 Kor 3:16; 1 Tes 4:3-5

* 6:15 6:15 1 Kor 12:27

¹⁶ Í nehme kahn re, nne no noongo a nnenkal as'sa, bo li ngubjing anyehnga? Tibre nwer Esowo bungu re, “Ane abal bao bahke fere jol ajehng.”

¹⁷ Nne no l'ya laake Ntul a Jisos, á li ajehng a ne go etohko.

¹⁸ Jahngen as'sa! Tibre abiafem nyako kpee lim ka ngubjing. Nne no l'lim abiafem nyao nya á noongo a nne, á limi tob ngubjing enye.

¹⁹ Anv, í nehme kahn re, ngubjing enyahne nyi li etahk ji Esowo, ji Etingi Etohko lene no, ji Esowo ma-n kaa? Í kpimm elnahne antahng. Esowo bi kpi-n no.

²⁰ Á gun-n ka ekun.† Owo nobo re wahn ka Esowo ellub go egahne agubjing.

7

Abahbe nya li bade elbal akoko

¹ Anv, n yahke bung bada nsol nyi í nyon-m no go egahne nwer. Nobo re nnenlum jol, k'bel nkal.

² Tib go enoongo ane ji ane kpo kono elgboko yel, nnenlum awohng awohng nobo re á bel nkal. Nnenkal awohng awohng nobo re á bal nlum.

³ Nlum a nne fuumu re á jo fili nkal ewe nob nob. Nkal a nne fuumu re á jo fili nlum ewe nob nob. Nne awohng awohng jo ka ntem ajehng ajehng ji á sebe no.

⁴ Nnenkal sang li nfona ngubjing enye. Nnenlum wo kpi. Nnenlum sang li nfona ngubjing enye, nnenkal wo kpi.

† 6:20 6:20 1 Pit 1:18-19

⁵ Kana jo lahm atemtem elnong, sehngem re no, n tohko toobo na re, wahn lim ano mmongare ntiil, eji n l'bel ngare nyi n bahke jo kak ero. Owo nobo re wahn fere ba kono, eji nnehm l'k'ba, ba gar-n. Tibre n nehm ma bob elnahne antahng.

⁶ Alum nya m bungu a, m bungem na ana ntahm. M bungu tibre n kp'kahne re nne li lenge lenge.

⁷ Kor-m kor re nne awohng awohng jol ana me n li no. Nne awohng awohng kpi akahmekahme ayare nya Esowo m-e ka. Nne noko kpi elkohn ayare nyaka, noko kpi elkohn ayare nyako.*

⁸ Alum nya n yahke bung a, n kp'bungu tong aneblum ba kala ko akal, a anebkal ba kala bal alum, go akalebun. Nobo ka bo re, bo sa ano, ana me n li no.

⁹ Bo tohko sahb ji ano, fuumu re aneblum ko akal, anebkal bal alum. Ga nob re nnenlum ko nkal, nnenkal bal nlum, sehngem re nnenlum jo gbo ngbabohngo a nnenkal, nnenkal jo gbo ngbabohngo a nnenlum.†

¹⁰ Alum nya n yahke bung a, n kp'bungu tong aneblum ba ma bel akal, a anebkal ba ma bal alum. Alum nya n yahke bung a, nyanyame sang, nya Jehova nya, nya li re, nnenkal, bo k'yaame abola nlum ewe.‡

¹¹ Tohko jol ano, á sa ano ntahngtahng, tohko fere jol ano, á feere goji nlum ewe. Nnenlum k'kam nkal ewe.

¹² Alum nya n yahke bung a, Jehova sang bungu no, mefono antahng wo kp'bungu tong egom ane

* 7:7 7:7 Mat 19:12 † 7:9 7:9 1 Tim 5:14 ‡ 7:10 7:10 Mat 5:32

bako re, nne awohng awohng no ma bel nkal, no ki li nne Esowo, nnenkal noo l'fere taame re á bahke jolo a ne, nobem re á kam-e.

¹³ Nnenkal Esowo awohng awohng no ma bal nlum no ki li nne Esowo, nnenlum l'fere taame re á jol a ne, nobem re nnenkal noo be-e sa.

¹⁴ Nnenlum no ki li nne Esowo, Esowo m-e ko ano, tib go esi ji nkal ewe. Nnenkal no ki li nne Esowo, Esowo m-e ko ano, tib go esi ji nlum ewe no li nne Esowo. Tohko jol ano abon ebahne nehm jol ka Esowo. Tib go esi jio, Esowo ebko bo ano.

¹⁵ Ye jio ji ki li nne Esowo l'seb re elbal nio mal, nong, jol ano. Mbang nyio o, nnenkal Esowo no elbal ma mal bo a nlum ewe, yebfor. Nnenlum Esowo no elbal ma mal bo a nkal ewe, yebfor. Tibre Esowo ma-r yehke re wahr jol go eyebatahng.

¹⁶ Nnenkal, a bahke limi renan kehm kahne, joare a bahke ma tahre nlum ewa? Nnenlum, a bahke limi renan, kehm kahne, joare a bahke ma tahre nkal ewa?§

Jol ana a jolo no ngare nyi Esowo lung-a no

¹⁷ Nong, nne awohng awohng jol ana Jehova ka-e no, ana á jolo no ngare nyi Esowo lung-e no. Nsol nyi ana, nyi n kpo tib go ero abehng abehng.

¹⁸ Nne awohng awohng no yehke nrur, Esowo kehm-e lungu, nong, á samme sa ano. Nne awohng awohng no ki yehke nrur, Esowo kehme lungu, nong, á k'kpe yehke nrur.

¹⁹ Afi nne y'yehke nrur, afi á yehkem, ejumjum limm. Ji li no li re, nne jo bum atahm Esowo.*

²⁰ Nne awohng awohng jol ana á jolo ngare nyi Esowo lung-e no.

²¹ A jolo nju, eji Esowo lung-a noa? Ka tiiri! A l'bel eyake ji a bahke foro, lim ano!

²² Nne no Jehova lung-e no, no li nju, á li nne no ma for go ejang bi Jehova.† Nne no ki jol nju ngare nyi Jehova lung-e no, ye nju nyi Kraist nyi.‡

²³ Esowo gun-n na, ka ekun. Kana fere jol aju ka ane.

²⁴ Abonanee, elkohn anehng anehng ni n jolo no, Esowo kehm-n lungu, saan ano a Esowo.

Abahbe nya li bade agol ane, a akalebun

²⁵ Bade agol ane, ntahm anyehng anyehng limm, nyi m ma ko goji Jehova. M bahk-n tongo ji n kp'tiri, me jia ji Esowo ma-m lim re, ane jo bum-m go etingitingi.§

²⁶ Tib go etahntahn ngare ana nyia, me n tir re, nobo re nne sa ano ona, ana á li no.

²⁷ A kp'kpi nkala? Ka seb mbang ana nyi a bahk-e yehke elbal. Nne no kala bel nkal, á k'seb nnenkal.

²⁸ A l'fere ko nkal, abiafem anyehng anyehng a limem. Nnenkal l'bal nlum, abiafem sang á ma lim. Ane bao bahke jo kono afem nyaka nyaka bel, a erem. Kor-m kor re wahn k'jol ano.

* **7:19 7:19** Mat 7:12; Gal 5:6; 6:15 † **7:22 7:22** Jon 8:32-36

‡ **7:22 7:22** Rom 6:18,22 § **7:25 7:25** 1 Tim 1:12

29 Abonanee, jia m bungu tib eji ngare ki kpe li gbalee.* Bomo anv a asongo, nobo re ane ba ma bel akal, bo jol ana bo kala bel.†

30 Ane ba kp'guunu, nobo re bo jol ana ba kil guunu. Ane ba li go eyebatahng, nobo re bo jol ana ba ki li go eyebatahng. Ane ba kpo gunu nsol, nobo re bo jol ana ane ba ki kpi nsol.

31 Ane ba kpo lim nsol nyi njini nyia a, nobo re bo jol ana ane ba ki kpi nsol nyio nyi njini. Tibre njini nyia ana nyi li anv bahke tane.‡

32 Kp-m koro re, wahn k'gbo yel go at'tiiri nya nsol njini nyia. Nne no kala ko nkal kpo ga tiiri eltum Esowo, ana á bahke limi ji bahke Jehova kor.

33 Nne no ma bel nkal kpo ga tiiri nsol nyi njini, ana á bahke limi ji bahke nkal ewe kor.§

34 Nnenkal no ma bal nlum, a nnenkal no kala bal nlum, elyaange nia. Nnenkal no kala bal nlum, afi ngbahme nyi, á kpo ga tiiri eltum Esowo, ana á bahke jolo saang go ngubjing, a etohko. Nnenkal no ma bal nlum kpo ga tiiri bada nsol nyi njini nyia, ana á bahke limi ji bahke nlum ewe kor.

35 N kp'bungu alum nyaa re me n kak-n na ebo, lohngem re n kp-n kpane na. N kp'sebe re wahn sahb j'jol nob nob, eji n l'sahb r'rod elnahne kpee ka Jehova, k'kpe jo kaake.

36 Nnenlum no ma lam elbal a mmongungu a nnenkal, eji kp-e sahb k'kor re á ko nkal, nnenkal l'fere kang sehngé ana á jol-e koko, nong, á ko-e ano, á jol nkal ewe. Abiafem sang na, á ma lim.

* 7:29 7:29 Rom 13:11 † 7:29 7:29 Luk 14:26 ‡ 7:31 7:31 1 Jon 2:15-17 § 7:33 7:33 Ef 5:29

³⁷ Nnenlum noo l'fere tir go ege eltim re, á nehm ko nkal, ana á bungu no nehm tiki kane, nnenkal no á ma lam elbal a ne, nong á jol, á ki-e kpe ko, ano wo á ma lim nob nob. Tibre ana kor-e no wo, á limi no, nnene we kpanem.

³⁸ Nne no l'ko nkal, á limi nob nob. Nne no tohko ko nkal, ye wo ga lim nob nob.

³⁹ Nnenkal no kpi nlum, á ka for, eji nlum ewe kpeke li go elkpin.* Nlum ewe l'kpo, yebfor. Á li ma kpe bal nlum awohng awohng no kor-e no, no li nne Esowo.

⁴⁰ Egama ntir li re, á bahke bele eyebatahng sehng, á l'sa ano, ana á li no. N kp'bumu re, me fvfo n tob kpi etohko ji Esowo.

8

Mbahbe nyi li bada nsol alehke nyi bo ma ko jom eblom

¹ Anv, bada nsol alehke nyi bo ko jom eblom, e kp'kahne re wahr ane kpee kpi elkahne. Elkahne kpo bum ane elgeere. Elgoro ni kpo lim ane gbal.

² Nne awohng awohng no l'tir re, ye kp'kahne ejum, á nehme kahn ana fuumu re á kahn.*

³ Nne no Esowo l'kor-e, Esowo kp-e kahne.

⁴ Bada nsol alehke nyi bo kpo ko jom eblom, e kp'kahne re, elom, ejum ji ane kpo fum ji, sehngem re Esowo na abehng bi li ejum.

⁵ Tibre nsol nyia tvv, nyi ane kpo lung re Esowo, nyindiki li go elbung, nyindiki li go ndi. Eblom ana bio bi ane kpo lung re Esowo, fere jo lung re Atul bia, lohko li go etingitingi.

* 7:39 7:39 Rom 7:2 * 8:2 8:2 Gal 6:3

⁶ Egahre, li Esowo na abehng ab'behng bi li Nso ejahre no limi nsol kpee, ye jio ji e li ka-e, go Ntul na awohng no li Jisos Kraist, ye jio ji wahnge nsol kpee kehm jolo, ye j'nehm ji kp'wahnge e kp'kpini.†

⁷ Fvfo, nne awohng awohng sang kp'kahne etingitingi jio. Ane bandiki, eblom ajomo kpuuru bo sehng. Anv, bo l'kehme nsol alehke nyio li, bo kpo kpe tir re, nsol alehke nyio li ka eblom. Eji ntir atahng ebo kil ga tahne, owo eltim ebo kil eljolo saang.

⁸ Nsol alehke, ebo abehng abehng wahr nehmm kak go ejang bi Esowo. E tohko li, ejum ajehng ajehng limm, ji bahk-r tane. Afi e li na, nsehng anyehng anyehng limm, nyi bahk-r kake.‡

⁹ Kunen ekpu go elforo nio ni m ma for, eji l'k'wahng ka ane bako ba kala tahne, gbo yel go abiafem.§

¹⁰ Nne no ntir atahng enye kala tahne l'nyehn-a, wo ji kpi elkahne, a kp'lehke nsol go etahk elom, jio nehmm tob lim-e re á tob li nsol alehke nyi bo ko jom ebloma?

¹¹ Ano wo elkahne ena bahke wahnge, nne no kala tahne kpo, tan, ye jio ji li mmonanne, no Kraist kpo, ka-e.*

¹² A l'lim elkohn abiafem ni bahke ranngentir atahng nyi abonane ebahne ba kala tahne, woblim abiafem, soodo Kraist.

¹³ Nsol alehke l'fere wahng mmonannee gbo yel abiafem, n nehmm kpe li nnyam nkpel anyehng

† 8:6 8:6 Kol 1:16 ‡ 8:8 8:8 Rom 14:17 § 8:9 8:9 Gal 5:13

* 8:11 8:11 Rom 14:15

anyehng, eji me n l'k'jol nne no bahke wahnge mmonannee gbo yel abiafem.†

9

Ntum nyi abatiingetib Jisos jo lim a ntuuru ebo

¹ Anv, me n limm nne no ma fora? Anv, me n ntiingetib a Jisos sanga? Anv, n ka nyehn Jisos Ntul ewahra?* Wahn sang li eltuuru go eltum ename ni n kp'limi ka Ntula?

² Afi ane bako me kpehme bum ana ntiingetib a Jisos, wahnfono antahng kp'taame re, me ntiingetib a Jisos wo. Tibre wahn ba li ane ba kp'tibi re, me n lohko li ntiingetib no Ntul a Jisos.†

³ Ana wo n kpo kono elbungu yehke elname, ane l'kehm-m abahbe bahb.

⁴ Anv, nobem re, bo jo ka-r nsol alehke, wahr lia, fere ka-r alahb, wahr wo go eltum ni e kp'lima?

⁵ Anv, fuumem re, wahr tob ko akala, jo tob yannge a bo, ana abatiingetib Jisos bako, a abo-nanyehn Ntul a Jisos, go Pitaa?‡

⁶ Anv, Barnabas a me, wahr wahr ba bahke jo lim eltum go aboa, kehm jo bel nsol alehke lia?

⁷ Nne awo ma w'wuk bada nne a nsoja no kpo kpi elne akpohko go eltum nsoja ni á kp'limi? Nne awo ma w'wuk bada mbahmgbe no kpo bahm egbe, k'li ejumjum go ege egbe? Afi wahn ebw'wuk bada mbaabebul no kp'baabe ebul ebe, k'li nnyam a mbul?

† 8:13 8:13 Rom 14:21 * 9:1 9:1 Elt 26:16 † 9:2 9:2 2 Kor 3:2-3

‡ 9:5 9:5 Mat 8:14

⁸ Anv, alum nyaa n kp'bungu go egame ekoa?
Anv, ntahm bungem ano jang janga?

⁹ Tibre bo nyono go atahm nya Moses re, “Kana jo gba nfong nnyo ngare nyi á kpi nkohl dv.”§
Anv, Esowo kpo tiiri efonga?

¹⁰ Esi ejahre sang wahnge á bungu ellum nioa?
Esowo nyono jio tib wahr. Nne no kpo bahm, a nne no kpo kpa, bo kpi ekunukpu re bo bahke bele eltuuru.

¹¹ Eji e ma bahm amohk nti nyao nya etohko go egahne ellong, anv, nobem re wahn tuur-r eltuuru nehka nehkaa?*

¹² Anv, ane bako l'bel nsahm nyi bo kpo ko nsol enyahne, wahr mee? Wahr ebyake nsahm enyahre bum go. Ga nob re wahr nyehn erem abehng abehng, sehng re wahr gbahk eti, sahd mbang nyio nyi nnoobo etib bi Kraist.†

¹³ Anv, n nehme kahn re, ane bao ba kpo lim eltum go etahk Esowo kpo bel nsol alehke ebo oa? Ane bao ba kpo lim eltum ajom alimi, bo kpo bel eltahme.

¹⁴ Ano wo fvfo Ntul a Jisos tongo re, ane ba kp'tiingi nnoobo etib, nong, bo bel nsol alehke o.‡

¹⁵ Me n yake nsahm anyehng anyehng nyio bum go. N nehme nyon nwer nyia tv-n, eji n l'jo ka-m nsol. Ga nob re me n kpo, sehng re nne awohng awohng ranngelgahm ename nia.

¹⁶ Tibre elbungu ni n kp'bungu alum Esowo, me nehme ka ejum ajehng ajehng ji bahke wahnge n geere. Tibre li ka-m re me n tiki lim ano. Eyuu a name, n tohko kpe bung alum Esowo.

§ 9:9 9:9 1 Tim 5:18 * 9:11 9:11 Rom 15:27 † 9:12 9:12 Elt 20:34-35 ‡ 9:14 9:14 Luk 10:7

¹⁷ Li re eltum nia n'name ni, ni n yehke re me n lim, kehn m bahke jo kunu ekpu re me m bel eltuuru. Eji ki li eltum ename, nobo re me n lim ana bo kak-m go ebo re me n lim.

¹⁸ Anv, jen ji li eltuuru ename? Eltuuru ename li re, me m bung alum Esowo tong nne awohng awohng mbol mbol, k'jo kunu ekpu re me m bel nsol nyi li ka-m re me m bel go eltum ni alum Esowo abungu.

¹⁹ Me n li nne no ma for. N kpeem li nju, jol eji m ma r'rod elname ka nne awohng awohng ana nju, eji n l'ga were ane tvv ka Esowo. §

²⁰ N l'kehme eljene a Jus, n kpo tob jol ana nne a Jus, eji n l'mal were Jus ka Esowo. N l'kehme eljene a ane ba kpo bum atahm nya Moses, jol eji n ki wob go elwo nio ni atahm, n kpo tob jol ana mbumatahm, eji n l'mal were ababumatahm ka Esowo.*

²¹ N l'kehme eljene a ane ba ki nyi atahm, n kpo tob jol ana nne no ki nyi atahm, eji n l'mal were ane bao ba ki nyi atahm ka Esowo. Jia lohngem re, n li na li, ntahm anyehng anyehng n kpimm go esamahr bi Esowo. Ntahm nyi Kraist nyi n kp'bumu.

²² N l'kehme eljene a ane ba kala tahne, n kpo tob jol ana bo, eji n l'mal were ane ba kala tahne ka Esowo. N kpo lim eljini ni nne awohng awohng, eji limi limi kan, n l'lub lim egom jindiki lub bel eltahre.

²³ Nsol nyia kpee n kpo lim tib go esi ji alum Esowo, eji n l'tob bel elfuulu ene.

§ 9:19 9:19 Mat 20:26-27 * 9:20 9:20 Elt 21:26

24 Ñ nehme kahn eljini ni abahl abeka? Ane kpee ba kpo be, nne awohng wo kpo bel eltuuru. Been, goji n l'bel eltuuru!

25 Mbekabahl awohng awohng kpo kuuru ngubjing enye, fere jo kunu elne ekpu go mbang anyehng anyehng, eji á l'bel ekpasi eltuuru ji bahke ranng na. Wo, wahr kpo tob lim eljini nio, eji e l'bel ekpasi eltuuru ji l'k'tiki ranng eranng ranng.[†]

26 N nehme be na be, k'kahn edi ji n kp'beke asongo re me n song rehng. N nehme fokko agbaji ana nne no kp'fohko agbaji nehme nehme.

27 N kpo fili ngubjing enyame ana nde nne no kpo fili abon ebe nyaame nyaame. Tibre n nehme seb re me m bung alum Esowo tong ane bako, mefono antahng fere gbo.

10

Erehke ji li bade eblom ajomo

¹ Abonanee, n kp'sebe re me m buum-n re, bab-nso ejahre kpee woomo go nla ekparesemsem, fere jen sehng go Abilaya.

² Bo bele ewohngalahb ji Moses go ekparesemsem, a aya mao, bo ane kpee.

³ Bo jo li nsol alehke nyi etohko, bo ane kpee.

⁴ Bo kpee wo alahb mao ma etohko. Tibre bo jo wo alahb go ekpartal ji etohko ji jo jen a bo. Ekpartal jio ji jolo Kraist.

⁵ Jol tvtv ona egom ane jindiki gbalee, Esowo, atahng we joom yebe tob bo. Bo jo kpo go elka emahng, edi ajehng ajehng ji bo l'je.

[†] 9:25 9:25 2 Tim 2:5

⁶ Nsol nyio kpee nyi li erehke ka wahr, eji e l'k'jo kunu amahr enyahre go ab'bi nsol nya bo jo lim.

⁷ Kana jo jom eblom ana egom ebo jindiki jo lim. Ana bo nyono go nwer Esowo re, "Ane bao kehm jehke, jo li, fere jo w'wo, fere tahm, jo bahn ase."

⁸ Jol nong wahr k'jo famme yanng e ana egom ebo jindiki limi no, toono o, efung abehng bo kpo ane atahltahl nkpel atahl abal, a nkpel elku ebal, a atahl awubu (23,000).

⁹ Wahr k'jo gare Ntul a Jisos ana egom ebo jindiki jo gar-e. Enyo kehm kehme bo tokko wul.

¹⁰ Kana jo memme ana egom ebo jindiki jo memme. Nr'ranng kehm ranng bo kpee.*

¹¹ Nsol nyia kpee limi bo, eji l'jol elliingi ka-r. Nsol nyia kpee bo nyono, eji l'jol erehke ka wahr ji kp'siki es'kohro ngare nyi yahke ba elkabbe.

¹² Owo wahng nne no l'bum re á yim na, nobo re á kunu ekpu, tohko jol ano á bahke gboko.

¹³ Elgaare anehng anehng limm, ni ma ba go egahne, ni kala b'ba goji ane bako. Esowo kpehme kane enyam ebe. Owo wahng ka á l'k'lim elgaare gbal sehng elwo enahne. Ngare elgaare nyio Esowo bahke limi eyake jio ji elbeke for, eji n l'mal elkpuumu.

¹⁴ Akpondahme enyame, owo nobo re wahn yake eblom ajomo.†

¹⁵ N kp'bungu tong wahn ji kp'bage. Tiren antahng bade alum nya n yahke bung.

¹⁶ Nkob nyio nyi elfuulu nyi e kpo kak Esowo saam, fere wo, anv, tibem re wahr wob go ellong

* 10:10 10:10 Hib 3:7-19 † 10:14 10:14 1 Jon 5:21

ane ba bo ma bak bo alung ma Kraista? Ebred ji e kpo kono elbakke, fere li, tibem re wahr wob go ellong ane ba bo ma bak bo ngubjing nyi Kraista?‡

17 Tibre li ebred na ajehng. Wahr kpee eji e li go egom, e li ngubjing anyehng.§ Tibre wahr kpee, bo ma-r bak ebred jio.

18 Nyehnen eljini ni anebe Israel jo kono ellimi. N' nehme kahn re, ane bao ba jo li nsol nyi bo jo ko lim njom ka Esowo, bo jolo ajehng a edi njom alimi jioa?

19 Anv, jia lohngo renan? Anv, elom l'lohng ejuma, afi nsol alehke nyi bo kpo ko jom elom nyi lohngo ejum?

20 E'ee. Ji n kp'bungu li re, ajomjom nya ane ba ki nyi Esowo kpo jom, bo kpo jom ka eblehm. Bo kpehme jom ka Esowo.* N nehme seb re wahn jol ajehng a eblehm.

21 N' nehm ma jo wo go nkob nyi Jehova, fere jo wo go nkob nyi eblehm. N' nehm ma jo li nsol go ekp'kuru ji Jehova, fere jo li go ekp'kuru ji eblehm.†

22 Anv, e kp'sebe re wahr lim, ala jo teelee Esowoa? Anv, e kp'tahne sehng yeaa?

23 Ane bandiki kpo bung re, "Wahr ebfor. E li ma jo lim ejum ajehng ajehng ji kor-r no." Ee, lohko li ano. Wo, nsol kpee sang kpo kak nne ebo. Wahr ebfor. E li ma jo lim ejum ajehng ajehng. Lohko li ano. Fvfo, nsol kpee sang li nsol nyi kpo lim nne gbal.

‡ 10:16 10:16 Mat 26:27; Elt 2:42 § 10:17 10:17 Rom 12:5

* 10:20 10:20 Ell 9:20 † 10:21 10:21 2 Kor 6:15-16

²⁴ Nne awohng awohng k'jo tiiri elne, nong, á jo tiiri nne noko.‡

²⁵ Jo liin nnyam anyehng anyehng nyi bo kpo gungu go are. Kana jo tohko bahb, tib esi ji ntir atahng enyahne.

²⁶ Tibre njini nyia kpee, a ejum ajehng ajehng ji li no, Jehova wo kpi.

²⁷ Nne no ki li nne Esowo l'tiing-a re wo je song li nsol alehke, j'jol re a bahke jeke, ajehng ajehng ji bo l'ka-a, li. Ka ji, bahb abahbe, tib esi ji ntir atahng enya.

²⁸ Nne noo l'fere tong-a re, “Nsol alehke nyia, bo ko jom eblom,” ka li nsol nyio, tib go esi ji nne no tong-a no, a esi ji ntir atahng.

²⁹ Lohngem re ntir atahng enya, nyi nne noko nyi. Nne nondiki li ma bahb re, “Jen ji wahnge n l'k'lim ana kp-m koro, tib esi ji ntir atahng nyi nne noko?”

³⁰ N l'kak saam go nsol alehke enyame, jen ji wahnge nne nondiki bahke bungu eb'bi tob-m, eji n kpi nsol alehke enyame li, nyi n kake Esowo saam?”

³¹ Ajehng ajehng ji n l'fere lim, afi n li na, fere w'wo, limen, goji Esowo l'bel ellub.‡

³² Jolen nob nob, eji n l'k'soodo Jus, fere soodo Grik, fere tob soodo aneb Esowo.*

³³ Jo limen ana n kpo lim. N kpo seb re nne awohng awohng bel eyebatahng go ejum ajehng ajehng ji n kp'limi. N kpehme seb re, jo nob a name. N kpo seb re, jo nob a ane bako, eji bo l'bel eltahre.

‡ **10:24 10:24** Rom 15:2 § **10:31 10:31** Kol 3:17 * **10:32 10:32**
Rom 14:13

11

¹ Toonen eljini ename jang jang ana n kp'toono eljini ni Kraist.

Ana fuumu re anebkal jo bulu ejum go esi, bo l'kehme ero kak

² N kpo tehk-n, tibre á kpo buum-m ngare anyehng anehng, fere toono eltibi ename ni n tib-n no.*

³ N kp'sebe re wahn kahn re, nne awohng awohng wob Kraist go elwo, nkal a nne wob nlum a nne go elwo. Kraist wob Esowo go elwo.†

⁴ Nnenlum awohng awohng no l'kak ero, afi á nyehne amahr nya Esowo, á l'bulu esi eje, yebdaange Kraist ji á wob-e go elwo.

⁵ Nnenkal awohng awohng no l'kak ero, afi á tob nyehne amahr nya Esowo, k'bulu esi eje, yebdaange nlum ewe, no á wob-e go elwo. Nnenkal noo li ana nnenkal no ma kpud esi eje.

⁶ Nnenkal no l'tong re á nehm bulu ejum go esi, nong, á kpud esi eje. Eji li ejum ndon re nnenkal kpud esi, nobo re á bulu na esi eje.

⁷ Fuumem re nnenlum bulu esi eje, eji á li eftu ji Esowo, fere kp'tibi ellub ene. Nnenkal kpo tib ellub ni nnenlum.

⁸ Tibre nnenlum lohngem goji nnenkal. Nnenkal wo lohng na goji nnenlum.

⁹ Tibre Esowo limem nnenlum tib go esi ji nnenkal. Nnenkal wo, á lim-e no tib go esi ji nnenlum.

¹⁰ Owo wahng ka nobo re nnenkal jo bulu ejum go ege esi, tib go esi ji babenjel.

* 11:2 11:2 Fil 3:17 † 11:3 11:3 Ef 5:23

¹¹ Go ejang bi Jehova, ki li nnenkal, kehn nnenlum jolem jo jini. Ki li nnenlum, kehn nnenkal jolem go jini.

¹² Tibre nnenkal lohng goji nnenlum. Anv, nnenlum, nnenkal wo kpo fere jel-e. Nsol kpee lohng goji Esowo.

¹³ Tiren antahng go, anv, n'nob re nnenkal kak ero ka Esowo, k'bulu esi ejea?

¹⁴ Anv, go amahr nyaka nyaka, á nehme ma nyehn re, li ejum ndon ka nnenlum re, alv esi tahb-e jvva?

¹⁵ Nnenkal no alv l'fere tahb-e, á bahke geere na. Tibre alabelabe alv enye Esowo ka-e ana ejum elbulu esi.

¹⁶ Nne awohng awohng no l'seb re á lim nfaabe go alum nyaa, nong, á kahn re, ano e kpehme lim, a aneb ero bako go fvfo.

Elkak ni elbuumu Ntul a Jisos

¹⁷ Go etoono erehke jia, wahn n nehme tehk. Tibre akon enyahne nya á kpo lim re kak-n ebo, kp'fere ranng na.

¹⁸ Go ngbokambang, bo tong-m re wahn ebyab, jol ag'gabe ag'gabe. Me m bum re, li ma jol etingitingi.

¹⁹ Tibre m bahke tiki jol ag'gabe ag'gabe, eji bo l'lingi ane bao ba li atingitingi ane.

²⁰ Ngare nyi á kpo je song kono edi ajehng, elkak ni elbuumu Ntul a Jisos sang á kpo song li.

²¹ Ane bandiki kpo ko nsol alehke ebo ba li go esamahr ane bako, jol nnene bo nehm sik, wo fere jo b'buumu. Nne nondiki li o, njal kp-e yame.

²² Anv, ntahk á kpimm na, nyi m bahke jo li nsol, fere wo alahba? N kpo daange aneb Esowo, fere jo riki akpak ndon.‡

Jen ji m bahke b'bung a nahne anv? Anv, me n tehk-n naa, afi? E'ee, wahn n nehm tehk.

²³ Nsol nyi n kpili goji Ntul a Jisos, nyi nyi n yahk-n tib a. Atv mao ma bo gungu Ntul a Jisos, á rodo ebred.

²⁴ Eji á ma kak Esowo saam, á kehm bakke, kehm bungu re, "A wo li ngubjing enyame nyi bo ma bakke ka-n. Jo limen anaana, eji á l'jo buum-m."

²⁵ Eji bo ma li nsol mal, á kehm kpe rod nkob, kehm bungu re, "Nkob nyia nyi li egbanngalung ji nfenfe ji alung emame. Jo limen ana go egame elbuumu ngare anyehng anyehng nyi á l'jo wo go nkob nyia."§

²⁶ Ngare anyehng anyehng nyi á jo li ebred jia, fere wo go nkob nyia, á kp'tiingi etib bi elkv ni Ntul a Jisos, tete á feere ba.

²⁷ Nne awohng awohng no l'li ebred jio, fere wo go nkob nyio nyi Ntul a Jisos, eji á ki lim go mbang nyi nno, á bahke lehke ebi, goji á ma lim abiafem, soodo ngubjing nyi Ntul a Jisos, fere soodo alung ma Jisos.

²⁸ Nong, nne tohko jo gbo mbang rab ala enye, kehm jo li ebred jio, fere wo go nkob nyio.*

²⁹ Tibre nne awohng awohng no l'li, fere w'wo, k'bum re ngubjing nyi Kraist nyi, li ana á ma li, fere lung elam tv elne.

‡ 11:22 11:22 Jems 2:5-6 § 11:25 11:25 Mak 14:22-24 * 11:28 11:28 Mat 26:22; 2 Kor 13:5

³⁰ Owo wahnge egom ejahne gbalee kil eltahne, egom jindiki gbalee kpo yam, jindiki kpo.

³¹ Li re e kp'lame elnahre antahng, kehn Esowo wahr nehm lam.

³² Jehova l'lam-r, jia lohngo re, á kpi-r erem kak, eji e l'k'li ebi semme a njini nyia.†

³³ Abonanee, nobo re n l'ba kono edi ajehng re n yahke li elkak ni elbuumu Ntul a Jisos, jo jiin sik ate ebahne.

³⁴ Nne awohng awohng no njal l'yam-e, á jo li nsol go etahk, eji á l'k'ba nkon, fere li ebi. Nsol nyehko nyi kpe li budu, n l'ba go, ba toobo, n kehm-n tongo.

12

Ayare nya etohko ji Esowo kpo yare nne

¹ Abonanee, n kp'sebe re wahn kahn go etingitingi bade ayare nya etohko ji Esowo kpo yare nne.

² N kp'kahne re, ngare nyio nyi n kala kahn Esowo, eblom bi kil jo bung bi jo fil-n, bi bi jo wahng n jo jen ana akamma ane.

³ Owo wahnge no n kp'sebe re wahn kahn re, nne awohng awohng limm, no kp'jene go etohko ji Esowo, no bahke suku Jisos. Nnene limm, no bahke ma bung re, "Jisos Ntul wo", tohko tiki jol re, etohko ji Esowo ji jolo a ne.*

⁴ Ajoobo ayare nya etohko nyaa gbalee. Etohko na ajehng aj'jehng ji kpo ka ayare nyao.

⁵ Ajoobo abang nyaa tvv, nya Ntul aloko. Li Ntul na awohng aw'wohng no e kpo lok-e.

† 11:32 11:32 Hib 12:5-6 * 12:3 12:3 Mak 9:39; 1 Jon 4:2-3

⁶ Ajoobo ane baa, ba Esowo kpo ko bo lim ajoobo ntum enye. Esowo b'nehm bi kpo lim nsol nyia kpee.

⁷ Nne awohng awohng ebbel ayare enye nya Etingi Etohko m-e ka, eji l'nob ka ane kpee.

⁸ Etohko j'nehm ji kpo lim nne noko jo bung alum nya nne a ngbere, j'nehm ji kpo tob lim nne noko jo bung alum elkahne,

⁹ j'nehm ji kpo tob ka nne noko eltaame, j'nehm ji kpo tob ka nne noko nsahm nyi elimanenob ayam ebo,

¹⁰ fere ka nne noko nsahm nyi akpokosi alimi, ka nne noko enyehnamahr ji Esowo, ka nne noko elkahne ni á bahke jo liingi etohko ji Esowo, fere liingi atohko nyandiki, fere lim nne noko jo bung ajoobo ajahbe nfenfe, fere ka nne noko elkahne ni á bahke jo tooro ana alum nyao lohngo no.

¹¹ Etohko j'nehm na ajehng ji kpo ka ayare nyaa, á kpo yare nne awohng awohng ana kor-e no.[†]

Ngubjing anyehng nyi kpi ajoobo gbalee

¹² Kraist li ana ngubjing anyehng nyi kpi ajoobo gbalee. Li ngubjing na anyehng any'nyehng, jol eji kpi kpi ajoobo gbalee.

¹³ Go etohko na ajehng wo, e ma bel ewohn-galahb, fere jol ngubjing anyehng, wahr ane kpee, Jus, a Grik, a aju, go ane ba ki li aju. Wahr kpee bo ma-r ka etohko na ajehng.[‡]

¹⁴ Tibre ngubjing kpimm ejoobo ejum ajehng, kpi ajoobo gbalee.

[†] 12:11 12:11 Rom 12:3; Ef 4:7 [‡] 12:13 12:13 Gal 3:28

¹⁵ Ekpade l'tong re, “Eji n ki li ebo, me ejum ngubjing sang,” lohngem re, ano wo bahke wahnge ka ekpade l'k'kpe jol ejum ngubjing.

¹⁶ Etung l'fere tong re, “Eji n ki li elmahr, me ejum ngubjing sang,” lohngem re, ano wo bahke wahnge ka etung l'k'kpe jol ejum ngubjing.

¹⁷ Li re ngubjing kpee kpi amahr amahr, kehn á bahke ma wuk renan? Li re ngubjing kpee kpi atung atung, kehn á bahke ma wuk es'svv renan?

¹⁸ Esowo kake ejum ngubjing ajehng ajehng edi ji kor-e no.

¹⁹ Li re ngubjing li ejumjum ajehng, kehn jolem jolo ngubjing.

²⁰ Ana wo li no, kpi ajoobo gbalee, wo ngubjing anyehng nyi li no.

²¹ Elmahr nehm ma tong ebo re, “Wa n nehme seb.” Esi nehm ma tong ekpade re, “Wa n nehme seb.”

²² A l'kpur nyehn, ano limm, ejum ngubjing jio ji lenge lenge, ji ji li etahntahn ejum.

²³ Ejum ngubjing ji kil jo lub, ji ji e kpo ga kpunu. Ejum ngubjing ji ki fuumu re jol gbuul, ji ji ga kpi ano.

²⁴ Wo, ejum ngubjing ji li gbuul kpehme seb ano. Eji Esowo limi ngubjing, á ka ejum ngubjing ji kil-r ga lub ekpunu sehng ejum jehko,

²⁵ eji ny'yabe anyehng anyehng l'k'jol go ngubjing, eji ejum ngubjing ajehng ajehng l'jo kak ejum jehko ebo. §

²⁶ Ejum ngubjing ajehng l'nyehn erem, ngubjing kpee bahke nyehne erem. Ejum ngub-

jing l'bel ellub, ngubjing kpee bahke bele eye-batahng.*

²⁷ Wahn ane kpee, ngubjing nyi Kraist nyi. Nne awohng awohng ewahne li ejum ngubjing nyio.

²⁸ Go ero, Esowo gbo mbang yehke abatiingetib, kehm kpe yehke abanyehnamahr, fere yehke at'tibi, go ane ba kpo lim akpokosi, go ane ba kpo lim ane nob ayam ebo, a ane ba kpo kak ebo go eltum, a ane ba kpo fili ane, budu ane ba kpo bung ajoobo ajahbe nya nfenfe.†

²⁹ Anv, ane kpee abatiingetib baa? Afi ane kpee anyehnamahr ba? Afi ane kpee at'tibi ba? Anv, ane kpee ba kpo lim akpokosia?

³⁰ Anv, ane kpee ba kpo mal ane lim, bo nob ayam eboa? Anv, ane kpee ba kpo bung ajahbe nyandika? Afi ane kpee ba kpo tooro ana alum nyao lohngo no?

³¹ Jo noken, eji n l'bel ayare nyao nya ga tahne. Anv, m bahk-n tibi mbang nyi ga nob.

13

Bade elkoro

¹ N l'bung go ajahbe nfenfe, fere jo bung alum enjel, k'bel elkoro, n li ana esoongo ji kpo lim ewok ewok, fere jol ana egbang bi kp'gbiki na gbik.

² Afi m bele nsahm nyi amahr anyehne, fere jo kahn ejum ajehng ajehng ji li mbehr mbehr, fere bel ellennge kpee, bel eltaame kpee ni

* 12:26 12:26 Rom 12:15 † 12:28 12:28 Ef 4:11-12

bahke jo melle awong, k'bel elkoro, n tohkem l'li ejumjum.*

³ Afi n yake nsol enyame kpee ka go, fere yake elname ka re bo jahm-m fi, k'bel elkoro, nsehng anyehng anyehng limm, nyi m bahke lehke.†

⁴ Elkoro ni kpo lim nne á mal elkpoooro, fere jol soom. Elkoro kpimm ala ateele, kpimm ejum nnyo aworo, kpimm elgeere.

⁵ Nne l'bel elkoro, á kpehme lim esabsab eljini. Á kpehme lim mbang ny'nye.‡ Eltim we kpehme rak sohk sohk. Á kpehme kud afem kak ala.

⁶ Á kpehme geere kak ebi ejum. Á kpo geere kak ejum ji nno.

⁷ Nne l'bel elkoro, á kpo kpuumu ejum ajehng ajehng. Á kpo taame tv ejum ajehng ajehng.§ Á kpi ekunukpu go ejum ajehng ajehng. Á kpo kpoooro go mbang anyehng anyehng.

⁸ Elkoro es'kohlo kpimm. Enyehnamahr bahke male. Elbunu go ajahbe nfenfe bahke male. Elkahne fvfo bahke tob mal.

⁹ Tibre ellennge enahre, a enyehnamahr ejahre nehm biingi go nseenga nseenge.

¹⁰ Ji biingi go nseenge l'si b'ba, ji ki biingi bahke male.

¹¹ Eji n jolo mmonse, n jo buntu ana mmonse, fere jo tir ana mmonse, fere jo lim ese. Eji m ma gbal, jol nne, n kehm soro yake nsol ese nyio tv go.

* **13:2 13:2** Mat 7:22; 17:20 † **13:3 13:3** Luk 10:27 ‡ **13:5 13:5** Fil 2:4,21 § **13:7 13:7** Elt 24:14

¹² Anv, e kp'fahnge go enyehn, jo nyehn advrehndv.* Ngare nyio e bahke nyehne saang.† Anv, ejang ji n kp'kahne. Efung bio bi m bahke kahne kpee, ana Esowo kp-m tob kahn kpee.

¹³ Nsol nyia na era nyi bahke sake, eltaame, ekunukpu, a elkoro. Elkoro ni ga gbal sehngesol nyehko kpee.‡

14

Ayare nya Etingi Etohko

¹ Jo noken, eji á l'bel elkoro. Gbehden, eji á l'tob bel ayare nyao nya Etingi Etohko, asehngesehnges ayare nya enyehnamahr ji Esowo.

² Tibre nne no l'bung, eji á ma bel ayare nya elbunu go ejahbe jindiki, á kpehme bung a ane, á kpo bung a Esowo. Tibre nnene limm, no kpo wuk ana á kp'bungu, eji á kpo bung alum nya li mbehr mbehr, nya Etingi Etohko m-e ka.

³ Nne no l'nyehn amahr, á kpo bung tong ane, lim bo, bo gbal, kak bo ebo, fere kak bo eltim.

⁴ Nne no l'bung alum ejahbe jindiki, ye kpo kak elne ebo ntahngtahng. Nne no l'nyehn amahr, á kpo kak aneb ero kpee ebo.

⁵ Kp-m koro re wahn ane kpee, wahn bung go ajahbe nyandiki. Kp-m gaka kor re, wahn ane kpee, wahn jol abanyehnamahr Esowo. Nne no l'nyehn amahr, ye wo ga kak ebo sehnges nne no kpo bung go ajahbe nyandiki, sehngem re nne nondiki noa, no bahke ma tooro, eji l'kak aneb ero kpee ebo.

* 13:12 13:12 2 Kor 5:7 † 13:12 13:12 1 Jon 3:2 ‡ 13:13 13:13
Rom 13:10

⁶ Abonanee, n l'ba go egahne, fere jo ba bung go ajahbe nyandiki, nnoobo anyi m bahk-n kake? Sehngem re no, m ba, ba tiing-n etib bi Esowo ma lennge ka-m, fere ka-n elkahne, fere ba nyehn amahr tong-n, fere jo tib-n.

⁷ Jol nsol nyi ki kpi elkpin ana efiri abola ebuk, nne tohko ma kub, á l'jo gbehre na gbehre, nne bahke limi renan, kehm kahne ana á kp'k'kub?

⁸ Nne no kpi ntang wor, jo ku ane, á tohko ma wor, á l'wor aji aji, nnene limm, no bahke toobo ebjing bi á bahke tahme ebta.

⁹ Ano wo tob li ka-n. N l'bung go ajahbe nyandiki nya ane kil elwuku, bahke limi renan, nne kehm kahne ji n kp'bungu? Tibre n kp'bungu na kak go elfeb.

¹⁰ Ajoobo alum nyaa gbalee go ajahbe nya njini nyia a. Ejahbe ajehng ajehng limm, ji alum ebo ki lohng ejum.

¹¹ Nne no l'lohng ejahbe jimongo l'kehme el-bungu, n tohko ma wuk ejahbe jio, n nehm wuk ji nne ejahbe noo kp'bungu. Ye nehm wuk ji me n kp'bungu.

¹² Ano wo tob li ka wahnfono antahng. Ana n kp'noko re wahn bel ayare nya Etingi Etohko, gbehden, eji n l'bel ayare nyao nya kpo lim aneb ero gbal.

¹³ Nong, nne no kp'bungu go ejahbe jindiki jo kak ero, eji á l'bel ayare nyao nya á bahke ma tooro ana lohngo no.

¹⁴ N l'kehme ero kak go alum ejahbe jindiki, etohko ejame ji kpo kak ero, ntir enyame kpehme kak ebo abehng abehng.

¹⁵ Anv, jen ji m bahke limi? M bahke kake ero go egame etohko, fere kak ero go egama ntir. M bahke yimi ase go egame etohko, fere yim ase go egama ntir.

¹⁶ A l'kak Esowo saam go ega etohko, bahke limi renan, nne noka noka no tob li ona, kehm taame re, “Emen” go ero bi a kake no, eji á ki kahn ji a bungu no?

¹⁷ Eji a jo kak ero bi a jo kak Esowo saam, afi nobo na, nne noko, ebo we a kakem nkpel anyehng anyehng.

¹⁸ N kp'kake Esowo saam, tib eji me n kpo bung ajahbe nyandiki sehng wahn ane kpee.

¹⁹ N l'jol go ellong aneb ero, n kpo ga tir re me m bung alum alon nya ane bahke ma wuk, eji n l'mal tib ane, sehng re me m bung alum ejahbe jindiki atahltahl nkpel ebal atahl awubu.

²⁰ Abonanee, kana jo rod elnahne bum ana abonse go egahna ntir atahng.* Jolen abonbili go abiafem alimi.† Go egahna ntir, jolen anebkul.

²¹ Bo nyono go nwer Esowo re,

“Jehova re,

M bahke koko ajahmjahm, go bo anyo wo,

m bahke bungu a ane ebame.

Jol bo m-e nehm wuungu atung.”

²² Owo e bahke kahne re, ayare nya elbunu go ejahbe jindiki limm ka aneb Esowo, li ka ane ba ki li aneb Esowo, eji l'kper bo tib Esowo. Enyehnamahr ji Esowo ji ji li ka aneb Esowo, limm ka ane ba ki li aneb Esowo.

* 14:20 14:20 Ef 4:14 † 14:20 14:20 Rom 16:19

²³ L'fere jol nyi aneb ero kpee bahke bake, ba kono edi ajehng, nne awohng awohng l'jo bung go alum ejahbe jindiki, ane ba ki li aneb Esowo, afi ajenne l'ba yel egahne ellong, bo nehm tir re, wahn ebgbo esahla?

²⁴ Ane kpee l'fere nyehn amahr nya Esowo, nne no ki li nne Esowo, afi njenne l'ba yel, alum nya á wuku no bahk-e kehme ellame go ege atahng, á fere nyehn elne ana nne abiafem.

²⁵ Ntir atahng nyi wob-e go ege eltim bahk-e lennge gbuul, á bahke gboko, kohk esamahr ebe go ndi, kak Esowo, fere jo bung re, "Esowo lohko li a nahne a, go etingitingi."[‡]

Ana fuumu re ero jol

²⁶ Anv, abonanee, jen ji fuumu re wahn lim? N' l'ba, ba kono edi ajehng, no nne bel ejum. Nne noko yehke ese, nne noko tib alum Esowo, noko tiingi etib bi Esowo ma lennge ka-e, noko bung go alum ejahbe jindiki, noko jo tooro ana lohngo no. Nong, ejum ajehng ajehng jol ekakebo ka aneb ero.

²⁷ Elbungu nio go ajahbe nyandiki, nong, jol ane abal, ane ara, noko gbo mbang, noko toono, nne awohng jo tooro.

²⁸ Nne awohng awohng tohko jol no bahke ma tooro, nong, nne awohng awohng belle, á k'kpe bung, á fere jo bung go ege eltim a Esowo.

²⁹ Go amahr anyehne, nong, ane abal, ane ara jo bung, ane bako jo wuungu atung, joare alum nyao li nseenge.§

[‡] 14:25 14:25 Jon 16:8 § 14:29 14:29 Elt 17:11; 1 Tes 5:21

³⁰ Nne no jehk no, Esowo l'ka-e alum re á lennge, nong, nne no yim no kp'bungu rahke.

³¹ Wahn ane kpee n li ma tooro enyehnamahr ji Esowo esenngesennge, eji nne awohng awohng l'kpili, alum nyao fere kak-e eltim.

³² Etohko jio ji abanyehnamahr Esowo kpi no wob bo go elwo.

³³ Esowo kpehme lim nsol enye jokko jokko jokko. Á li Esowo bio bi elkoono.

Go ekp'kpa ero ajehng ajehng ji aneb Esowo l'song kono,

³⁴ nobo re, anebkal jo belle. Fuumem re bo jo bung. Tibre anebkal sang kpo fili aneblum, ana ntahm nyi Moses bungu no.*

³⁵ Ejum ajehng ajehng ji bo l'seb re bo kahn, nong, bo jo bahb alum ebo go etahk. Tibre li ejum ndon sehng re, nnenkal jo bung go ekp'kpa ero.

³⁶ Anv, wahn ba, alum Esowo lohng go egahna? Anv, wahn ba wahng ka alum Esowo ba noa?

³⁷ Nne awohng awohng no l'tir re, ye nnyehnamahr Esowo wo, afi á tongo re, á kpi etohko ji Jehova, nong, á taame re, nsol nyi n kp'nyono a, atahm nya Jehova nya.†

³⁸ Nne awohng awohng no l'jol ntahnsi a nne, nong, á sa ano.

³⁹ Abonanee, noken, wahn jo nyehn enyehnamahr ji Esowo. Kana sahde eyaame ji elbungu go alum ajahbe nyandiki.

⁴⁰ Nong, ejum ajehng ajehng jol songo songo, fere n'nob.

* 14:34 14:34 1 Tim 2:12 † 14:37 14:37 1 Jon 4:6

15

Elnyahme ni Kraist nyahme go elkv

¹ Abonanee, n kp'sebe re me m buum-n bada nnoobo etib bi n tiing-n no, bi m ma taame tv, fere kp'toono.

² Etib bia ana bi m ma wuk, n l'soro asi elbumu go etingitingi, bahk-n tahre, tohko jol ano, wahn ebtaame mbol mbol.

³ N tohko gbo mbang tong-n nsol nyi n wuku no re,
Kraist kpo ka-r tib esi abiafem enyahre, ana nwer Esowo bungu no.

⁴ Á kpo, bo kpa-e kak. Nfung era,
Esowo nyahm-e go elkv, ana nwer Esowo bungu no.*

⁵ Owo á kehm song kpiri Pita,†
kehm kpe song kpiri abatiingetib ebe, ewubu ane abal.

⁶ Efung abehng á kehm kpe song kpiri abat'toono bako,
ane atahltahl atahl alon s'sehnge.
Egom ebo jindiki gbalee jia, kpeke li go elkpin, jindiki ebkpo.

⁷ Owo á kehm song kpiri Jems, kpe song kpiri abatiingetib ebe kpee.‡

⁸ Es'kohro, á kehm gohro ba kpiri me ji li ana nne no bo jel-e eji ngare ma sehng.§

⁹ Me wo li nkahlanjahm a nne go ellong abatiingetib Jisos. N tohkem f'fuumu re bo lung-m re

* 15:4 15:4 Luk 24:25-27 † 15:5 15:5 Luk 24:34 ‡ 15:7 15:7
Mak 16:14 § 15:8 15:8 Elt 9:5

ntiingetib a Jisos, tibre n jo nohko aneb ero ba Esowo sehng.*

¹⁰ Nnoobo nyi Esowo nyi wahnge n li ana li li a. Nnoobo nyi á ka-m no, m-e á kaam mbol mbol. N' l'fere nyehn, ga, me n lim eltum sehng nne awohng awohng go ellong abatiingetib Jisos. Jol me sang na, nnoobo nyi Esowo nyi li a name nyi.

¹¹ Afi jolo bo, afi fere jolo me, ana e kpo bung, ano wo m ma tob taame.

Elnyahme ni e bahke nyahme go elkv

¹² Eji e kpo bung alum Esowo re, Kraist ebnyahme go elkv, jen ji wahnge egom ejahne jindiki kpo bung re, akvne nehm nyahme go elkv?

¹³ Akvne tohko nyahme go elkv, lohngo re, Kraist nyahmem go elkv nkpel anyehng anyehng.

¹⁴ L'jol re Kraist nyahmem go elkv, lohngo re, alum Esowo nya e kp'bungu li mbol mbol, eltaame enahne fvfo tob li mbol mbol.

¹⁵ L'jol etingitingi re, akvne nehm nyahme go elkv, lohngo re, e kp'kimi efahng lake Esowo, tibre e kpo yiimi ntianse re, Esowo nyahme Kraist go elkv, ye ji á ki-e nyahme.

¹⁶ Re akvne k'nyahme go elkv, lohngo re, Kraist nyahmem go elkv.

¹⁷ Li re Kraist nyahmem go elkv, kehn lohngo re, eltaame enahne li mbol mbol, abiafem enyahne nyaa, kpeke wob go egahne atahng.

¹⁸ Ebtob lohng re, ane ba taame tv Kraist kehm kpoko, bobkpo tan.

¹⁹ Li re ekunukpu ejahre ji e kp'kunu re, Kraist bahk-r kake nnoobo, nnoobo nyio l'fere jol ka

* 15:9 15:9 Ef 3:8

elkpin ni e li a ni anv ni ni, kehn e kp'fili ane ndon sehng e nne awohng awohng.

²⁰ Li etingitingi re, Kraist eblohko nyahme go elkv, ana ngbokambang a nne no ma gbo mbang nyahme go ellong akvne.†

²¹ Ana nne awohng wahng e no elkv ba go njini, ano wo fvfo nne awohng ma tob wahng elnyahme go elkv ma tob ba.‡

²² Ana Adam wahng e no nne awohng awohng bahke kpoko, ano wo fvfo nne awohng awohng bahke tiki bel elkpin tib esi ji Kraist.

²³ Nne awohng awohng bahke nyahme go ege a ngare. Kraist wo jolo ngbokambang. Ane bao ba li ka Kraist, bo bahke nyahme ngare nyi á l'ba.§

²⁴ Owo es'kohro ngare bahke kehm rehng e, nyi Kraist bahke taare etul abehng abehng, fere radde atubesi kpee go bo a ntum, fere taare ellub anehng anehng. Owo á bahke kehm faake nji etul enye ka Esowo Nsoo.

²⁵ Tibre Kraist bahke tiki fili adi kpee, tete á bob anebekv ebe kpee, kunu bo akpade.

²⁶ Nnekv no á bahk-e gohro ranng e, elkv ni.*

²⁷ Tibre nwer Esowo bungu re, “Esowo ebrod ejum ajehng ajehng bum-e re á kunu akpade.” Eji nwer Esowo bungu re, “Ejum ajehng ajehng,” alum nyaa lohngem re, Esowo bi wob Jisos go elwo, tibre Esowo bi yake nsol nyio kpee, kak-e go elwo.

²⁸ Eji nsol kpee bahke woomo Kraist go elwo, ano wo fvfo Kraist bahke tob woomo Esowo go

† 15:20 15:20 Kol 1:18 ‡ 15:21 15:21 Rom 5:12-19 § 15:23

15:23 1 Tes 4:16-17 * 15:26 15:26 Ell 20:14

elwo, bi yake nsol kpee kak-e go elwo, eji Esowo l'fili kpe kpe.

²⁹ Anv, ane bao mee, ba ma bel ewohngalahb tib go esi ji akvne? L'jol re akvne kpehme nyahme, jen ji wahnge ane bao kpo bel ewohn-galahb tib go bo esi?

³⁰ Jen ji wahnge e kpo kono elgboko yel go efin ngare anyehng anyehng?

³¹ Abonanee, n kp'kpoko efung abehng abehng.[†] N kp'bungu jia tib go elgeere ni n kp'geere kak-n, eji n li ka Kraist Jisos Ntul ewahre.

³² N kp'bungu anv go mbang nyi nne. Eji n jolo go Efesus, jo nok a “abibbib enyam bio”, nsehng anyi n li no? L'jol re akvne kpehme nyahme go elkv, nong, wahr limen ana bo tubu elgan re, “Nong, wahr jo liin nsol, fere jo w'wo, tibre behna e bahke kpoko.”

³³ Nong, nne ki-n nehm! Nne l'jo jen a abi ane, nnoobo eljini ene bahke yaange.

³⁴ Nong, amahr enyahne jol sange sange, goji n l'gbo ntir, rahke abiafem go ellimi. Li ejum ndon sehng re me n tong-n re, Egom ejahne jindiki Esowo, bo nehme kahn.

Ngubjing nyi e bahke bele, e l'nyahme go elkv

³⁵ Nne nondiki li ma bahb re, “Akvne bahke nyahme renan? Elkohn ngubjing anyi bo bahke bele?”

³⁶ Wo egboolo nne jia, ejum ji a l'bahm, tohko tiki bol, nehm tiki mahng.[‡]

[†] 15:31 15:31 Rom 8:36; 2 Kor 4:10-11 [‡] 15:36 15:36 Jon 12:24

³⁷ Ejum ji a kpo bahm go ndi, elrahnti sang, mmohk eti nyi, fundiki mmohk eti ana mmohk elkohl, fundiki mmohk eti nyindiki.

³⁸ Esowo kpo ka mmohk eti anyehng anyehng eljini ngubjing ny'nye ana kor-e no. Mmohk eti anyehng anyehng kpi eljini ngubjing ny'nye eje eje.

³⁹ Agubjing nya nsol nyi li go elkpin go njini nya limm elkohnkohn anehng. Ane kpi elkohn agubjing nya bo. Enyam kpi elkohn agubjing nya bo. Nruk kpi elkohn agubjing nya bo. Nsahre fvfo tob kpi elkohn agubjing nya bo.

⁴⁰ Agubjing nya ejahbetul Esowo nyaa. Agubjing nya njini nya nyaa fvfo. Agubjing nya li go ejahbetul Esowo kpi ano nya bo eje eje. Agubjing nya li go njini nya tob kpi ano nya bo eje eje.

⁴¹ Njul kpi ano nyanye eje eje. Ebareka tob kpi ano nyanye eje eje. Alonlo fvfo tob kpi ano nya bo eje eje. Go ellong alonlo, ano nya bo li nkohn a nkohn.

⁴² Ano wo fvfo elnyahme ngubjing go elkv li no. Ngubjing nyi e kpo kpa kak ndi, bahke bolo. Ngubjing nyi ma nyahme go elkv nehm kpe bol.

⁴³ Nyi bo ma kak ndi kp'sabe, nyi ma fere nyahme, ebbel ano. Nyi bo ma kak ndi, ebkpuk, fere leenge, nyi ma fere nyahme, ebtahne, fere bel nsahm.§

⁴⁴ Ngubjing nyi bo ma kpa kak, li ngubjing nyehka nyehka, nyi ma fere nyahme li ngubjing ana nyi etohko. Ngubjing nyehka nyehka l'jol, lohngo re, ngubjing nyi etohko nya, tob li.

§ 15:43 15:43 Fil 3:20-21

⁴⁵ Tibre nwer Esowo bungu re, “Ngbokambang a nne no bo jo lung-e re Adam, Esowo lim-e, ka-e elkpín.” Adam jehko ji gohro ba es'kohro, á li etohko ji kpo ka elkpín.

⁴⁶ Etohko sang gbo mbang ba. Ngubjing nyi gbo mbang ba, etohko kehm bake.

⁴⁷ Ngbokambang Adam, Esowo ko ndi mong-e. Etoono Adam, Ntul ewahre wo, no lohng go ejahbetul Esowo.

⁴⁸ Ana nne no Esowo ko ndi mong-e li no, ano wo fvfo ane ba tob lohng ndi li no. Ana nne ejahbetul Esowo noo li no, ano wo fvfo ane ba ejahbetul Esowo tob li.

⁴⁹ Ana e li anv go elfoongo ni nne no Esowo mong-e go ndi, ano wo fvfo e bahke tob jol go elfoongo ni nne ejahbetul Esowo noo.

⁵⁰ Abonanee, n kp-n tongo jia ana, tibre ngubjing nyehka nyehka nyi kpi alung nehm tiki yel go ejahbetul Esowo. Nsol nyi bahke bolo nehm tiki yel edi ji nsol nyi l'k'tiki bol bahke jolo.

⁵¹ Wuungen atung, me n tong-n nkpokosi ejum. Wahr ane kpee, e nehm kpo na kpo kpee, wahr ane kpee bahke yaange,*

⁵² elwaare elwaare, bahke ware ana ejehbek-pakemahr, ngare nyi e l'wuk es'kohro ntang.† Tibre bo bahke woro ntang nyi akvne bahke nyahme go elkv, fere ba bel ngubjing nyi l'k'tiki bol. Wahr kpee bahke yaange.

⁵³ Jio ji kpo bol, bahke yaange, fere jol ji l'k'kpe tiki bol.

* 15:51 15:51 1 Tes 4:15-17 † 15:52 15:52 Mat 24:31; Ell 10:7

⁵⁴ Ngare nyio nyi jio ji kpo bol ma yaange, fere jol ji l'k'kpe tiki bol, jio ji kpo kpo ma yaange, fere jol ji l'k'kpe tiki kpo, owo alum nwer Esowo kehm jolo go etingitingi, nya bungu re,
 “Bobnok ebta sehngelkv, elkv ebmal kpee.

⁵⁵ Elkv, ntahn wo á bahke noko ebta sehngelkv me?

Elkv, etakelehk eja j'na?”

⁵⁶ Etakelehk ji elkv, abiafem nya.‡ Nsahm nyi abiafem, atahm nya.§

⁵⁷ Me n kak Esowo saam, eji á ka-r Ntul a Jisos Kraist ji noko ebta ka-r, ga anebekv ebahre.

⁵⁸ Owo abonanee, nobo re wahn jo yiimi t'tahne, eji nne l'ki-n ma nyeenge go mbang anyehng anyehng. Yelen k'kahb go eltum Esowo, wahn jo lim, eji n kp'kahne re, eltum ni n kp'limi ka Ntul ewahre, n nehme lim mbol mbol.*

16

Ayare nya li ka aneb Esowo bako

¹ Bade akpohko nya n kp'tahbe re wahn song kak aneb Esowo bako ebo, ana n tongo aneb ero ba li go Galesa, tob limen ano fvfo!*

² Ngbokambang efung go erahde, nne awohng awohng ewahne jo yehke akpohko ana á bele no, kuuru go, eji n l'ba, n l'k'tohko kpe ji, tahb na.

³ N l'ba, ba rehng go, owo m bahke tumu ane bao ba m ma yehke bo, ka bo awer, eji bo l'ko ayare enyahne, tahm a nya go Jeusalem.

‡ 15:56 15:56 Rom 6:23 § 15:56 15:56 Rom 7:13 * 15:58 15:58

Jon 4:36; Ell 22:12 * 16:1 16:1 Gal 2:10; 6:10; 2 Kor 8:7-12; Elt 11:29

⁴ L'fere nob re me n tob je, bo li-m ma toono.

Nsol nyi Pol jo tir re á lim

⁵ N l'rehng go Masedonia, m bahke soro rehng go egahne. Tibre mbang a Masedonia nyi m bahke sehng.[†]

⁶ Ma m bahke kange a nahna nji. Ma n li ma ba, ba kang a nahne elkoko mal a nji, eji n l'tv-m edi ajehng ajehng ji n l'kpe je.

⁷ Tibre n nehme seb re me n nyehn-n anv, eji n kp'sehng na sehng. N kp'sebe re me n kang na abon afung a nahne, Jehova l'taame.

⁸ M bahke kange ga Efesus tete efung Pentikost rehng.[‡]

⁹ Tibre egburu eyake eltum eblennge ka-m, wo gana, anebekv baa gbalee.§

¹⁰ Timoti l'ba go egahne, vvren ye. Tibre á kpo tob lim eltum Esowo jang jang ana n kp'limi.

¹¹ Nong, nne awohng awohng ki-e bum reed.* Tvvn ye go eyebatahng, eji á l'feere ba tob-m ga. Tibre n kp-e siki re á ba, a aneb Esowo bako go.

¹² Mmonannee Apollos, n kpo rehk-e re á ba go egahne, a aneb Esowo bako. Anv, we nehme kor re á ba nkpel anyehng anyehng. Á l'bel eyake, á bahke bake.

Alum nya Pol ko, kohro nwer nyia

¹³ Jo baaben! Yiimen t'tahne go egahne eltaame! Belen esahb, wahn bel nsahm!

¹⁴ Ejum ajehng ajehng ji n kp'limi, jo limen go elkoro.

[†] 16:5 16:5 Elt 19:21 [‡] 16:8 16:8 Elt 19:1,10 § 16:9 16:9 Ell 3:8; Kol 4:3; 2 Kor 2:12 * 16:11 16:11 1 Tim 4:12

15 Abonanee, ń kp'kahne re, Stefanas, a nlaaga enye, bo ba gbo m̄bang taame tv ntul a Jisos go Akaya.† Bobrod elbo kak go eltum Esowo, eji bo l'jo kak aneb Esowo ebo.

16 N kp-n rehke re, wahn jo wuk elkohn ane ana bao, a nne awohng awohng no kpo tob lim eltum ana bo, fere jo loko.

17 Eltim ma-m yebe sehng, eji Stefanas, a Fortunatas, go Akaikus bo ma ba. Tibre bo ba li ane ba limi re, me m bel eyebatahng, eji ń ki li.

18 Bo ma-m kak eko, fere tob kak-n eko. Jo kaken ane ba li ana bo.

19 Aneb ero ba li go Esia tong-m re, me n kak-n nnyo. Akwila abola Priskilla nkal ewe, a aneb ero kpee ba kpo je song kono asi go etahk Akwila, bo tob tong-m re, me n kak-n nnyo go mbing nyi Ntul a Jisos.‡

20 Aneb ero kpee tongo re, me n kak-n nnyo. Eji ń kp'kake atemtem nnyo, jo soden atem anyo, ana abonanyehn nne.

21 Mefono antahng Pol, n kp'nyono nnyo akake mia go egame ebo.

22 Nne awohng awohng no Ntul a Jisos Kraist tohk-e kor, nkuk a ne!§ Maranata! (Ji lohngo re, Ntul ewahre, ba!)

23 Nnoobo nyi Jisos Kraist Ntul ewahre jol a nahne.

24 Elgoro ename ni Kraist Jisos jol a nahne wahn ane kpee.

Emen.

† 16:15 16:15 Rom 16:5 ‡ 16:19 16:19 Rom 16:3-4 § 16:22 16:22 Gal 1:8-9

Ekajuk Scriptures Bible Portions

Ekajuk: Ekajuk Scriptures Bible Portions (Bible)

copyright © 2024 Luke Initiative for Scripture Translation and The Seed Company

Language: Ekajuk

Contributor: Luke Initiative for Scripture Translation

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

- You include the above copyright and source information.

- If you make any changes to the text, you must indicate that you did so in a way that makes it clear that the original licensor is not necessarily endorsing your changes.

- If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-02

PDF generated using Haiola and XeLaTeX on 1 Jul 2025 from source files dated 2 Jul 2025

fac6af8a-bed4-59a3-a152-52e0061121a4